



# Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 6 Yangia anidakangma : Tir Yimyim tiryimyim@aolima tir yimyim TAPAK 3

Centre-i UNESCO dangi Charaideo Maidam tenung abentsü: CM Sarma

Republic Day Parade nung tongti tejaokerji Egypt tir asütsü

VOL. XX NO. 100 (ADOK 100) DIMAPUR AMUNGNÜ (SUNDAY) ANEJETI (JANUARY) 22, 2023 ₹ 5.00

## Governor Prof Mukhi-i Longwa yimtsung semdang



Assam aser Nagaland Governor Prof Jagdish Mukhi-i Longwa yimdak Mon district nung office tekolakpurtem den sensaksemba angur.

**Dimapur, January 21, 2023 (TYO):** Assam aser Nagaland Governor Prof Jagdish Mukhi aser pa kinungtsü Prem Mukhi nati January 21, 2023 nü Mon district kübok Longwa yimtsung semdanga liasü.

Iba otsütsü aketba yimtsung semdangba ya maongka ka lir ta Mon district nung Governor Mukhi-i office balala nung tekolakpurtem den ajurutepdang ashi.

"Prime Minister Narendra Modi-i Delhi nung aliba Red Fort nungi Swachhta Abhiyan tenzütsüdüng nübortemi kechiba PM Modi-i tilateri onüktem indang jembir ta bilem. Saka iba scheme tenzükbä ajanga linük nung tesümgangtsü temelenshi aruogo kechiyong tanurtemi school nung jana endokenra masür. Tanü Delhi nung gari nungi lenmang nung jana meindoker" ta Governor Mukhi-i ashi.

Merükmejuba ya Mahatma Gandhi nungi angazükba lir, ta paisa shisem.

"Prime Minister-i linük nung ki shia aser yimtsung shia nung electricity agütsütsü atema alizüing yua lir aser tanü Mon nung yimtsung tasen kar dak alaka yimtsung ajak nung electricity tongogo" ta paisa metetdaksü.

Senden nung Health and Family Welfare, School Education aser PHE Department temi

PowerPoint presentation sayuba atema Governor-i tebilemba kar lemsatepdang "Jal Jeevan Mission ajanga Mon nung yimtsung 142 nem tzü agütsüba ya mapa tila ka repringtsü akok saka tzü ya nisung ajaki nungdakba lir aser iba scheme ya kanga tongtipang lir" ta ashi.

Paisa Mon Deputy Commissioner dang School Education Department indang khurettem repringtsü aser bangdakpur dangi tesayur nungdakba atema shidi zülutsü atema tetuyuba agütsü.

Mon nung Higher Secondary School ka nung dang science stream agiba osang angashia Governor Mukhi-i Mon DC dang tanga Higher Secondary School ka nung science stream tenzütsü atema tetuyuba agütsü.

"Sorkar mapa inyakertem ya kanga tia taka kechiyong nenok nem akhüm aser tashi agüja lir aser iba ya nütsung yongsük 1% den teküpok lir. Anungji sorkar mapa inyaker ka dak tebilemstü khuret tulu lir kechiyong pa/la ji tushir aser teyari meshia arur len anitsü koka lir" ta Prof Mukhi-isa ashi.

Nübortem atema langka tajung inyakba ajanga mapa inyakba nung janra atemer, ta paisa ashi.

Mon DC, Ajit Kumar Verma IAS-ia o jembidang Mon nung Village Tourism inyaksü lenmang aika lir ta ashi.

## Kohima nung R-Day atema senden ayonger

**Dimapur, January 21, 2023 (TYO):** Kohima Deputy Commissioner, Shanavas C IAS-i Republic Day benjung atema January 23, 2023 nü senden ka ayongzükogo.

Nagaland Civil Secretariat Plaza, Kohima nung benjung amongtsü aliba atema Kohima DC-i iba senden ayongzükoger ta sangdong ka nung ashi.

Kohima DC Shanavas-isa tsünglangen agüja alirtem senden nung arua adentsü mepishia metetdaksüogo.

SP Kohima, Commandants of 1st Assam Rifles, Kohima; 14th Assam Rifles Pipe Band, Kohima; 37th BSF, Chedema; 78th Bn CRPF Kohima; 4th NAP, Thizama; 10th NAP (IR) Bn, Zhadima; Home Guards & Civil Defence, Kohima; NCC Group HQ Kohima; State Commissioner, BS&G Kohima; Administrator, KMC; Station Director, Doordarshan/ AIR Kohima; CMO Kohima; DSO Kohima; DPRO Kohima; DCO Kohima; EE PHE/Power/PWD

(Secretariat Complex) Kohima; EE PWD (R&B) Kohima; Secretary, Indian Red Cross Society, Kohima Branch; RTO Kohima; Presidents of Nagaland Contractors & Suppliers Union/ Puliebadze Club/ Lions Club/ Royal Club/ Classic Club/ Rotary Club/ Suncity Kohima/ Kuonuo Multipurpose Society, Kohima/ Gorkha Public Panchayat, Kohima/ Kohima Press Club/ Hindu Kalyan Samithi, Kohima/ IRCS State Branch/ Nagaland Voluntary Women Association/ Beauty & Aesthetic Society of Nagaland/ Nagaland Adventure Club/ Nagaland Flying & Adventure Sports Association/ Nagaland Motorcycle Club/ Angamimipfii Mechii Krotho; President, Kohima Chamber of Commerce & Industry; Secretary, Zila Sainik Board, Kohima; All Civil Society Organizations/NGOs and All HQ Administrative Officers/ Political Assistant to DC/Head DB, DBs Court Kohima.

## Nagaland elections tiptema aser ochishia agitsü ayongzükoger

**Kohima, January 21, 2023 (TYO):** Nagaland assembly elections nung sendaka alir ajaki election tiptema agitsü atema yariteptsü ayongzükoger, ta Nagaland Chief Electoral Officer (CEO), V Shashank Shekhar-i ashi.

Press Information Bureau (PIB), Ministry of Information and Broadcasting indang Nagaland kongsang ajanga one-day media workshop (VARTALAP) sentong nung pai iba osang metetdaksü.

Honibarnü Eastgate Hotel nung Systematic Voters' Education and Electoral Participation (SVEEP) and Ethics of Election Reporting indang omen nung ajemdaker iba sentong agia liasü.

"Nagaland State Assembly Election atema voters 13,17,632 lir aser parnoki polling booths

2,315 nung vote enoktsütsü. Loktiliba nung sendaktepa alir ajaki shilem agi nung dang election tiptema agitetsü" ta CEO Shekhar-i ashi.

"Naga nunger dang loktiyimten sobaliba lir aser iba tangatetba ya taruba State Assembly Election nung bentshüsü imlar. Vote enoktsür shiai pei indang vote enoktsü atema onoki inyaksü" ta paisa ashi.

Iba atema Persons with Disabilities (PwD) aser teintet rogotem atema maparen renemtsüogo. Arishi küm 80 ser temapurtem pei kidang nungi vote enoktsütetsü, ta paisa shisem.

Election Commission of India (ECI)-i state shia nung election tiptema aser ochishia agitsü atema inyaker. Iba atema State police aser central police aika

mapa lemzütsüogo, ta Nagaland CEO-isa metetdaksü.

Nagaland state police-i law & order mapa inyaksü, Excise department-i mita repringtsü aser Central agencies-i income tax evaluation asütsü, ta paisa ashi.

"Item mapa ya loktiliba nung vote enoktsür nungi tenzüker political party tem aser media külemi yaritep nung dang akoktsü" ta Shekhar-isa ashi.

Iba sentong nung menden ya Assistant Director, PIB, Kohima, K. Sonikumar Singh liasü.

Maneni, sentong nung shisalen sayurtem- Joint Director, DIPR, Asangla Imsong-i

"Checking misinformation specially in social media during elections" aser Joint CEO, Nagaland, Sharon Longchari-i "Dos and Don't of Election Reporting- An ECI perspective" onüktem jembir.

## Centre-i PM Modi indang BBC document series noktanger

**New Delhi, January 21, 2023 (Agencies):** British Broadcasting Corporation (BBC) ajanga Prime Minister Narendra Modi dak sendakba document series ka sayaba Centre-i noktangogo.

"BBC indang document series ya tiyazü ta asüba otsü ka prokshitsü atema yangluba lir" ta Ministry of External Affairs spokesperson Arindam Bagchi-i ashiba sülen anogo ka lir Centre sorkari noktangogo.

BBC indang documentary tenungji 'India: The Modi Question' lir aser iba nung PM Modi-i Gujarat Chief Minister inyakang BBC reporter kati pa den sensaksemba dena lir.

BBC reporter jagi Modi dang 2002 Gujarat mepetmesü aser telok o telok tsüingda raratepba indang asüingdanga liasü.

Godhra nung Hindu nunger temeshi aini aoertem amenba train ka nung mi senoktsüba ajanga iba mepetmesü adoka liasü. Iba ajanga nisung meyrjang ka tema tepset aser ozüing alema mapa inyakba jenti atalok.

Honibarnü Centre sorkari YouTube aser YouTube links nung BBC documentary noktanger.

Ministry of Information and Broadcasting-i BBC Documentary indang mezüngbuba episode sayaba sülen YouTube videos adokba noktanger.

Ministry-isa Twitter danga BBC series indang link dak sendakba tweets 50 tema noktangtsü tetuyuba agütsü aser YouTube o Twitter-i tashi angaa inyakogo.

Ministries of External Affairs, Home Affairs aser I&B ajanga documentary repringogo. Parnoki ashiba agi iba series ajanga India nung Supreme Court ketdangtsüba nung tai apur aser India nung telok balala tsüingda telemsa adokdaksür.

"BBC-i India nung document series mesaya aser YouTube channels kari 'anti-India' tangatetba ajungkettsü atema sayu" ta I&B Ministry atema advisor Kanchan Gupta-i ashi.

## Political party tem den senotsü amshiyim indang senden amen



January 21, 2023 nü Nagaland CEO Shashank Shekhar-i pa indang office nung political party balala den senden amenba angur.

**Dimapur, January 21, 2023 (TYO):** January 21, 2023 nü Nagaland Chief Electoral Officer indang office nung political party tem den election nung senotsü amshiba mita repringba indang senden ka menogo.

Senden nung CEO V. Shashank Shekhar, IAS-i political party ajak dang ECI ajanga lateta aliba inyakyim aser tetuyuba sülen anidaksü ashi.

Paisa mapang shitak nung DEO kübok Election Expenditure

Monitoring (Nodal Officer) nem senotsü endokba osang agütsütsü tetuyuba agütsü.

Candidate kati election nung Rs. 28 lakhs tashi dang endoktsüla ta CEO Shekhar-i political party tem dang nenshia metetdaksü.

General Observers, Central aser State agency ajanga candidate temi senotsü endokba mita repringtsü anungji political party ajaki süoki ia inyaksü ayongzükoger, ta CEO-isa ashi.

Iba senden nung Election Expenditure Monitoring, Nodal Officer, CEO Office, Hiazu Meru-i political party ajak dang nomination masüding star campaigners tenung ajak agütsütsü metetdaksü.

CEO Shashank Shekhar-i political party tem dang social media nung taila osang azüoktsü aser ken o benoktsüba kümra pei pei DEO mesüra dial Toll-free no.1950 nung osang agütsütsü atema mepishia metetdaksü.

## 22buba KPC foundation day mungogo



22buba KPC foundation day amungdang tangokba noksa nung angur.

**Dimapur, Aenjeti/January 21 (TYO):** 22buba Kohima Press Club (KPC) foundation day, January 20 nü LCS Building, Kohima nung mungogo.

Sentong nung tir o jembiba mapang KPC tir, Alice Yhoshü-i, küm 22 tejakdang osangbener kari state yimtiba nung Press fraternity atema kanga süoki ia bilema club tenzükba indang bilemtetshia jembi.

"Tanübo Nagaland nung asenok ya Press Club tejentiba kümogo. Kohima Press Club koba züngsem ishikati tenzükba liasü, iba ya tanübo lokti tashi tait ka kümogo, kong print aser electronic media nungi züngsem 60 dak tema kümogo," ta Alice-i ashi.

Laisa, club tenzükertem aser taoba mapang lenirtem-i

Kohima nung press fraternity yangertsü atema meranga inyakba atema parnok dang kanga pelaba lemsatep.

"Media professionals ama tarutsü nung ken o balala ajangshia aotsü, talisa tangarden tebilemdangba meputepertem nungi taitsuba aika ajangshitsü. Item tetsüdakstütem ya kodaser koktettsü ta süra, khuret angatetba osangbener kaka ama asenoki koda tebandang makai ochi asoshi nokdaker iba dak keta lir," ta tir-i ashi.

Laisa, züngsemtem dang maneni bendanga agütsüshir nürburtem aser lokti tenzüktsü asoshi ayongzükba liasü.

Club nguteter aser advisor Kopeloe Krome-ia o tatsüka jembiba mapang, osangbener

ishikati club tenzükba bilemtetshia jembi.

Paisa, computer, internet aser mobile phone tem maliba mapang nung osangbenertem kanga timtemtepa inyakba indang lemsatepa liasü.

Krome-isa, osangbenertem dang pei mapa süoki ia agitsü ayongzükba liasü.

Loreni Tsanglao, shiba lenisüba nung iba sentong agia liasü, lai züngsetem dang pei mapa nung bendanga agütsüshir tenzüktsü aser sorkar aser nürburtem tsüngda apulatsür ka akümtsü ayongzükba liasü.

Sentong nungsa Club's treasurer Rühlhoutuonuo Theünuo nem aküm tetushi agütsüba mapang ka ayongzükba agi, shiba 2022 küm January 20 nü süogo.

## Directorate of School Education-i metetdaktstür

**Dimapur, Aenjeti/January 21 (TYO):** Directorate of School Education-i sangdong ka ajanga, National Policy of Education (1986) dak ajemdaker India sorkari sempet aketba tanur aser talisa yimdak yimtsüng nung alirtem nem jenjang aketba modern education agütsütsü asoshi Jawahar Navodaya Vidyalayas amenok. Tang tashi nung linük kübok tesem balala nung JNV 649 amenokogo, ta metetdaktstür.

Jawahar Navodaya Vidyalayas kübok Class VI nung admission ya Jawahar Navodaya Vidyalayas Selection

Test (JNVST) ajanga agir. Class VI Selection Test atema Online Registration ya NVS website nung [www.navodaya.gov.in](http://www.navodaya.gov.in) link ajanga agitsü aser application benoktsü atema tatembangbuba anogoji January 31, 2023 asütsü. District tem nung JNV tem dang kaketshirtem registration agitsü asoshi teyari agütsütsü aser selection test indang osang tejangja agütsütsü tetuyuba agütsüogo.

Iba tatidang agütsütsü atema jangrartem ya district kübok kinük nung aliba tesemtem nung alirtem asünung, parnok nem teyari agütsütsüji kanga

tongtimbang, ajita mesüra temsüa aliba aser takok tajung ngur aliba kaketshirtem aikati online registration facility indang osang mangutsü akok.

Anungji Directorate of School Education-i, DEO, Sr. SDEO aser SDEO ajak dang, JNV Selection Test nung shilem agitsü atema Online Registration indang osang agütsütsü aser JNV nung angati agi agütsüba modern quality education aser infrastructure tem indang metetdaktstütsü asoshi parnok kübok aliba sabangtem ajak amshitsü metetdaktstüogo.

## Mokokchung DC-i MCC Committee tentetstüogo

**Dimapur, Aenjeti/January 21 (TYO):** Deputy Commissioner & District Election Officer Mokokchung, Shashank Pratap Singh IAS lenisüba nung, 14buba Nagaland Legislative Assembly 2023 General election takok ngua agitsü atema Model Code of Conduct shidak benoka inyaksangshitsü asoshi committee ka tentetogo.

District Level Standing Committee züngsemtem yamai alitsü:

1. Deputy Commissioner & District Election Officer, Mokokchung -Chairman.
2. Superintendent of Police, Mokokchung -Züngsem
3. EAC Ongpangkong - Züngsem.

4. DPRO, Mokokchung - Züngsem.

5. President/Secretary/ Representative of all Political parties - Züngsem.

6. Asst. Election Officer, Mokokchung - Züngsem. Mezüngbuba Committee senden January 20 nü Deputy Commissioner conference Hall nung agiogo, kong züngsem ajaki shilem agia liasü. Senden nung Deputy Commissioner-i, 14buba Nagaland Legislative Assembly 2023 election mapang benoka inyaksangshitsü aliba Model Code of Conduct indang züngsemtem nem metetdaktstü. Mokokchung SP-ia kasa onük nung jembia liasü.

Senden nungsa candidate

temi election mapang anidaktstü nüngdaka aliba expenditure head wise approved note list lemja liasü.

Kasa mapang nung Mokokchung Deputy Commissioner & District Election Officer, Mokokchung, ShashankPratap Singh, IAS-isa, Chief Electoral Officer shiti aser Election Commission of India tetuyuba dak ajemdaker Mokokchung District kübok Bank Managers/Branch Managers ajak dang election nung tokteptsü aliba candidate tem Bank Account balaka lapoktsü asoshi window ka lapoktsütsü aser iba mapa atema mejeta staff tem lemzüktsütsü asoshi metetdaktstüogo.

## Kohima DC & DEO-i ayonga senden ka menogo

**Dimapur, Aenjeti/January 21 (TYO):** 14buba Nagaland Legislative Assembly 2023 General Election dak sendakba nung political party balala nungi representative tem den January 20 nü Deputy Commissioner Office Conference hall Kohima nung senden ka menogo.

Senden nung DC & DEO-i, temzüng ozüng kübok inyakimtem rasa ashi aser sen intokba aser asadanga aser tetuyuba sülen manidakertem anema jenjang agitsü alibatem indang Election Commission-i tetuyuba agütsür aliba metetdaktstü.

Mendenbubaisa taruba election nung sen kwi intoktsü temelaba agütsür lir iba indang metetdaktstü. Maneni political party tem dang ECI tetuyuba aser MCC, EE aser IT dak sendakba ken o tem indang guideline tem Nodal Officer temi metetdakja liasü. Iba senden nung political party ter nungi representatives temi shilem agia liasü.

Kasa anogo nikongtsütsü Model Code of Conduct dak sendakba nung District Level Standing Committee aser stakeholder tem senden ka mena liasü.

## Z. Kasheto Yeptho 5 Ghaspani- II AC nungi tokteptsü



Z. Kasheto Yeptho

**Dimapur, Aenjeti/January 21 (TYO):** February 27 nü agitsü aliba Nagaland Assembly election nung tokteptsü atema Z. Kasheto Yeptho-i Honibarnü officially sangdongogo.

Kasheto ya 5 Ghaspani- II Assembly Constituency nung Republican Party of India (RPI) ticket amer tokteptsü, koba state election nung RPI party mezüngbuba toktepta

asütsü. Party-i candidate pongushi yoktsü ta party tir Mughato Ayemi-i ashi.

2018 küm general election nung Kasheto ya Independent candidate ka ama 4 Ghaspani- I Constituency nung sitting MLA Jacob Zhimomi den toktep saka tamakok angu.

Hotel Acacia nung tanü iba osang sangdongba mapang Kasheto-i, pa dak tamang katetba atema aser party tenüng nungi tokteptsü asoshi maongka agütsüba atema RPI party dang kanga pelaba lemsatep. Paisa, pa nem party ticket agütsüba atema RPI tir aser Union Minister of State Ramdas Athawale dang kanga pelaba lemsatepa liasü.

Kasheto ya 4 Ghaspani -I nung Jacob Zhimomi den tokteptsü atema renema liasü, saka tenaprongla kibong ka nungidang ta tangatetep ka dangi aruba sülen 5 Ghaspani-II nungi tokteptsü atema telemtetba agia liasü.

## Mkg nung Election Expenditure Monitoring Cell senden tanabuba menogo

**Dimapur, Aenjeti/January 21 (TYO):** Mokokchung District kübok taruba General election atema Magistrate/In-Charge, Police personnel (FST/SST) Election Expenditure Monitoring Cell team lenirtem senden den repsema training sentong tanabuba DC Conference hall nung January 20 nü agiogo.

Training mapang AEO, Accounting team, MCMC, Flying squad team, Static

Surveillance team, Video Surveillance team aser Video viewing team atema Election Expenditure monitoring module, Dhritishree Bordolai, MGNF, Aosanen, DLMT aser Lipoktoshi, DLMT nungeri lemsatepa liasü.

Training nung okila DC & DEO Mokokchung, Shashank Pratapsingh, IAS aser SP Mokokchung, Manoj Kumar IPS nati jembia liasü.

## Kohima DC-i hadir balala bener mesenzüktsü tenokdangba agütsü

**Dimapur, Aenjeti/January 21 (TYO):** CrCP, Sections 144A kübok tashi agüja aliba dak ajemdaker Deputy Commissioner & District Magistrate Kohima, Shanavas C IAS-i, osang agütsüba anogo nungi tenzükba Kohima district nung shingaia hadir balala (prangbong, nok, süng, nü, tapoktsü osettem, lijak mesüra hadir balala) bener

mesenzüktsü tetuyuba agütsüogo. Osang tejangja ka magütsü tashi iba tetuyuba ya benoka inyaksangshia atatsü.

Taruba 14buba Nagaland Legislative Assembly 2023 General Election yimjung nung tebandang kecha makai sadem sadema agitsü atema election dak sendakba nung aser Election Commission of India tetuyuba dak ajemdaker iba tetuyuba agütsüogo.



January 21, 2023 nü New Delhi nung Defence Minister Rajnath Singh aser NCC Director General Lt. General Gurbirpal Singh nati NCC Republic Day Parade 2023 camp semdangba mapang tangokba noksa nung angur.

### Republic Day Parade nung tongti tejaokerji Egypt tir asütsü

New Delhi, Aenjeti/January 21 (Agencies): Taküm India nunger 74buba Republic Day tongti sentong nung tongti tejaokerji Egypt Tir, Abdel Fattah El-Sisi asütsü, ta Honibarnü ministry of external affairs-i metetdaksü.

Ato kilonser, Narendra Modi-i jaokba nung ajemdaker Egypt Tir, el-Sisi-i January 25-26 anogotem nung India semdangtsü, ta foreign ministry-i metetdaksü.

MEA sangdong ajanga, "Asen Republic Day anogomong nung tang mezüng Arab Republic of Egypt Tir tongti tesemdanger asütsü jaoker," ta metetdaksü.

Republic Day parade nungji Egypt army contingent katia shilem agitsü.

Egypt Tir el-Sisi-i India semdangba mapang nung Ato kilonser, Modi den senden amentsü aser shishilembar lenirtem-a ajurutsü.

Pa den minister pongu aser

tongti ketdangsertem telok ka arutsü. Arrshi küm 68, el-Sisi January 24 nü Delhi tonga arutsü aser pai linük semdangba ajanga linük ana tsüngda tesendaktep ano tajungba akümtsü imlar.

Tamalen Sisi-i October 2015 nung India semdanga 3buba India Africa Forum Summit nung shilem agi aser 2016 küm September ita nunga India semdanga liasü.

India aser Egypt na tsüngda tesendaktep yangluba sülen taküm küm 75 ajunger, 2022-23 küm India G20 Tir asüba mapang nunga India-i Egypt 'Guest Country' jaoka lir.

"January 25 nü Rashtrapati Bhavan nung Tir Sisi agizüksü aser kasa aonungji Tir, Droupadi Murmu-i tejaoker ketdangsertem atema chiyungba sentong ayongzüksü. Tir Sisi-i linük ana tsüngda senden nung shilem agitsü aser Ato kilonser (Modi)

tena leniba nung ketdangsertem senden mena linük ana tesendaktep, regional onüktem aser international onüktem nung o lemteptsü," ta Ministry of External Affairs-isa metetdaksü.

External affairs minister, S Jaishankar-ia Tir Sisi ajurutsü aser tesemdanger ketdangsertemi kasa anogo nungjisa shishilembartem den shisa lemsateptsü, ta MEA-i metetdaksü.

India aser Egypt na ya akhidang nungi tesendaktep junga lir aser shishilembaba tsütsüa tesendaktep kanga junga lir. Financial Year 2021-22 nung India aser Egypt na tsüngda shishilembabaji dollar sen billion 7.26 liasü. India-i Egypt dang nungi alizükbaji dollar sen billion 3.15 liasü aser Egypt-i India dang nungi alizükbaji dollar sen billion 3.74 liasü.

Tir Sisi-i India semdangba mapang nung linük ana tsüngda tezüngzüktep trok agitsü imlar.

### Employee union 50-i Old pension plantanaben agüjang ta akhanger

New Delhi, January 21 (Agencies): Hokolbarnü Central aser state government employee unions 50 dak temai sorkar dang old pension scheme (OPS) tanaben agüjang ta takhangba agütsüba den külemi sorkar dang, iba takhangbaji magizükra unions-i longkak sashia aitsü aser lenmangtem mokdangtsü, ta metetdaksüo.

Parnokisa, tang aliba national pension scheme (NPS) ya mapa nungi anisüngzüker alirtem atema kanga majung, ta

metetdaksü. National Joint Council of Action (NJCA) Convenor, Shiv Gopal Mishra-i, "Sorkari onoki akhangba agizüksü, ta onoki amanger, ajisüaka parnoki magizükra onoki longkak sashia aitsü aser linük tesem ajaklen lenmang (train aser gari lenmang) mokdangtsü," ta metetdaksü.

NCAJ nungji railway workers organisation tongti ana- All India Railwaymen's Federation (AIRF) aser

National Federation of Indian Railwaymen (NFIR) nata densema lir.

"January 1, 2004 sülen mapa nung join asür Central government employees aser state sorkartem nung mapang balala nung mapa nung join asürtem asoshi tenzüka NPS ya mapa nung anisüngzüker alirtem atema kanga majung. Iba (NPS) ya old pension scheme nung nangzüka alibatem den khenyongi meputep," ta NJCA-i metetdaksü.



Joshimath, January 21, 2023: Ali anenoka ia ki noklang aika raksaba Joshimath jila anasa tenemtem nung rürjep laa aliba noksa nung angur.

### MULUNGNEO

Onoki teti meima aliba tsürabur AKANGNUNGLA (Merangkong) shirangba mapang nungi tasüba anogo tashi nung kija, kibong aser lokti balalai nübu, rongsen, aser sarasadem den mangyimba mapang nung ozü mulung senepja yariba asoshi nenok ajak dang kanga pelaba lemsateper.

Oda item dak alaka tenüng kar metetshi melitet nung yamai agütsür.

1. Shri Amenba Yaden Honorable MLA 21 Tuli A/C
  2. Mr. Shaying Sheu ADC Tuli
  3. Lakhuni Baptist Church
  4. Lakhuni Village Council
  5. Lakhuni Fellowship Dimapur
  6. Kinunger Baptist Church
  7. Chuchuyimlang Town Baptist Church
  8. Chuchuyimlang Town Baptist Church Women Ministry
  9. Merangkong Baptist Church Women Ministry
  10. Mepongsen Kiyong Lanur Merangkong
- Nenok mapa tajung asoshi asen teyanglur Tsüngremi moajang ma.



-Temeim Chirmur, Semchir, aser Kinunger Adianu.



Kolkata, January 21, 2023: Tesayurtem shimba maparen nung ochimashi ken o dak sendakba nung Enforcement Directorate (ED)-i Trinamool Congress lenir, Kuntal Ghosh pua court matsüngdangi anir aodang tangokba noksa nung angur.

### Delhi LG-i tiyazü nung Delhi Education Dept nem tai tongloktsür: Sisodia

New Delhi, January 21 (Agencies): Honibarnü AAP lenir aser Delhi Deputy Chief Minister, Manish Sisodia-i Delhi Lieutenant Governor, VK Saxena aija, LG-i tiyazü nung education department nem tai tongloktsür aser Delhi nung tesayurtem atalar, ta metetdaksü.

LG, Saxena dangi züluba shidi ka nung Sisodia-i, Hokolbarnü LG-i Chief Minister Arvind Kejriwal dangi züluba shidiji yimtenren tsütsü nungi zülü aser tiyazü nung education department nem tai tongloktsüba ya Delhi nung tesayurtem aser kaketshirtem mezüngmeshiba lir, ta metetdaksü.

Deputy Chief Minister, Sisodia-i education portfolio-a repsema abener.

Saxena dangi züluba shidi nung Sisodia-i yamai shia lir, "LG-i yimtenren tsütsü nungi shidi ka züluba Education Department of Delhi-i mapa kecha meinyaker ta ashi. Tai tongloktsüba ya Delhi nung kaketshirtem aser tesayurtem mezüngmeshiba lir. Ni LG dang ozü tesayurtemi inyakba mapa matalatsütsü atema mepishir, kechiyong parnoki education department nung mapa tajung jenti inyakogo." Hokolbarnü chief minister

Kejriwal dangi züluba shidi nung LG-i Delhi nung Aam Aadmi Party (AAP) sorkar kodamasüba tensa ka nung yutsütsü atema education sector dak sendakba nung melung masüba onük aika metetdakja liasü, ta pai ashi.

Iba dak sendakba nung Kejriwal-i social media ajanga, Delhi shisaliok jenjang tajungba kümdaktsütsü atema yimti nung tesayurtem, kaketshirtem aser tsüraburtemi tesüiba küm tenet tashi kanga meranga inyaka arudar, ta metetdaksü.

"LG-i Education system mezüngmeshitsü melenbo LG-i parnok ang ajungmesotsüla," ta chief minister-isa metetdaksü.

Tawa Sisodia-i, Delhi sorkar school tem nungi tesayurtem Finland-i yoka training agidaktsütsü sentong lir, ajisüaka LG-i nokdang, ta aija liasü.

Sisodia-i, LG-i tesayurtem training agitsü atema Finland-i yoktsü memelaba ya AAP sorkar indang "education model" anema inyakba mapa ka lir, ta aija liasü.

Finland nung aliba Jyväskylä University nung Delhi sorkar school tem nungi tesayurtem anogo pongunü training agitsü atema renema liasü saka LG-i ashishir, ta AAP-i aitsür.



# TIR YIMYIM

## YIMOBILEM (EDITORIAL)

DIMAPUR AMUNGNÜ, AENJETI (JANUARY) 22, 2022

### Mezüngmeshi mesüdaktsütsüla

**M**ezüngmeshiba indang kodang jembidir, asenoki tsükchitepa raratepba mesüra züktepba indangang jet ta temulungjangi arur, anungji tangar nem mezüngmeshi mesüdaktsütsü atema asenji tara, samaro aser nisung tesashi asütsüla ta bilemer. Ajisüaka, tenyar Paul-i 1 Timoti 4:12 nung Timoti dang ashiba o yabo, tangar nem mezüngmeshi mesüdaktsütsüa samarosa sashisashia liang ta ashirba masü saka tangar ajaki tatishitsü tajung agitsüsa taküm merükteta ajemalua alitsü, mesepleptsü, azümasena malitsü, tiyazü mejembitsü, temeim mapa nung anünga malitsü aser tangari mapa ajak nung temulung lemtettsüsa alitsü atema ashirba liasü. Atangji, Timoti ya kanga nendaka inyakba aser Tsüngrem tenzüksü jangraba asangur ka liasü, ajisüaka pa taküm nunga tasü aser tashi itta Tsüngrem metenzüktettsüsa temang aser tanüla nung mekokmein liasü. Ibayongji, Paul-i Timoti dang pa poknung tashidak agi mapang shia timatempa ajungtsü atema 1 Timoti 5:23 nung tsükmenatsü yi terara jemang ta ashiba angutsü. Tetezü, tangar nem asen taküm mezüngmeshi mesüdaktsütsü atema asen temang nunga tashi itta alitsüla. "Pabo temang nung tashi mait, kecha mesütettsü, teti dang shiranga alir," ta tangari asen indang jembira, ibaji asen mezüngmeshia jembiba o asütsü. Iba amaji tangar nem asen temang nung mekokmein aliba agi mezüngmeshi mesüdaktsütsü atema asenoki asen temang anepalu asütsüla aser mapa ajak nung kümdangkümdanga inyakba nisung ka asütsü tim. Ano, Timoti dak tashimait kaji, pai pasasa ilaa bilemba shisatsü ka liasü, kechiyong pa ya asangur ka dang, anungji tenyar Paul nungger mapang arogo tasen tenzükba aoba mapang nung arogo aser yimten lenir taintem nem tangatetba agüja sayutsüngia senzüsübaji asangur ka asoshi mapa tasak liasü. Ajisüaka, Tsüngremi Timoti Pa mapa atema ajabaji pa arishi küm, pa temang aser asoajen repranger aja masü saka Timoti dak Tsüngrem mapa inyaktsü jangraba shisatsüji dang Tsüngremi reprangteta ajaba liasü. Ibayongji, tenyar Paulisa Timoti tasü itdakja, "Tsüngremi asenok nem tetsübu aser anüalemba tanüla magütsü saka ain tashi, temeim aser tangatetba agütsü," ta 2 Timoti 1:7 nung ajungshiba asenoki angur. Atangji, Timoti dang masü asenok ajak ya ajungli ka dang lir, anungji aji bilemdangbo ajungli küma aotsüba taküm kati kechi inyaktettsü (?) ta asenoksasa tasü mait bilemetsü. Ajisüaka, Paul-i ashibaji, iba ajungli nungji ain tashi apuokja lir, anungji iba ain aser tashiji amshia tangatetba agi temeim mapa inyaktettsü. Ashiko, asenok dakbo Timoti dang nungi teimba temang nunga aser tanüla nunga tashi mait alitsü. Iba jagi aiben asenoki Tsüngrem tenzüksü asoshia tasümeiteti bilema alitsüa akok. "Ni ama kati kechi sütettsü? Ni ano tain masü? Tazüng temetetba kecha balaka mali, sensaker! Parnoki ni ashiba nung mamangtsü, ni temang nunga mekokmein aika lir," ta asensasa asen ilaa bilema kecha lenia maotsü aser kecha meinyaktsü asoshi ajentsü lenmangang bushia kuli aika jembitsüa akok. Iba ama mapang nungji, Tsüngremi asen nem ain tashi agi tebilemetsü ajak kokteta aotsüsa tangatetba agütsüba indang ashiba o ya bilemtettsüla. Atangji, asen nem ain tashi agütsübaji Tsüngremisa arua amshitsü asoshi agütsü masü saka asenoki amshitsü asoshi agütsü ta asenoki angateta tamang agi amshitsüla. Ashi, Tsüngrem aruagi amshitsü asübo Pai asenok nem ain tashi magütsüla. Tetezü, alima nung Tsüngrem melena inyaktsü asoshi Pai asen nem ain aser tashi agütsü. Iba ain aser tashiji amshia Tsüngremi mulungba mapatem inyakra, shibaibo na mezüngmeshitsü (?) ta Paul-i asenok nem angatetdaktsüner. Nisungtemi asen dak temulung melemteti "pabo tetenya kechiyong pai shitak meinyaktsü, paibo metongtsütsü, pa dakbo temulung alemtsüla masü, par sarasadembajibo tiyazü," ta jembitsüsa asen taküm aser kibong lira, tangari asenok mezüngmeshir asütsü. Iba amaji shinga nema asenok mezüngmeshi mesüdaktsütsüsa mapa aser o nung, Tsüngremia aser nisungia asen dak temulung lemteta aser akümtsübu bilemetsüsa asenok alitsü Tsüngrem o agi asenok ajungshir.

## OLEMSABANG

### AMANGBABUR, MAMANGBABUR, ASER MANGMANGBABUR

~ Süpongnüngsang Longkümer, Darogapathar Dimapur

Akidangbo kanga rongdak osang atema post office nungi Telegram yokbajia tekaratiba agi habda ka tashi nungang osangji ang saka tanütensa nungpo newspaper, Youtube Media etc, tapu aika alinungji jangratemtsüka, saka iba nungi prokshiba agi tetushia yakta angur aser maksütsüba agi nisung ya takidak makatsüsa kümdaktsür ta tamasa okila. Tasü madak takok ngur shia aruba khrista dak Amangertem dang amangpaburtem aser parnok dang tamangertem ta ajar. Saka shia aruba dak mamangtettertem dang limabur ta ajar.

Mangmangertem, Shia aruba khrista dak amanger ta tzüsen saka yi ajemer, she azü mazüoktetter, katsümentsür, temeshi amongnü amonger saka tekülemi maor, sarasatemtsü mashi, aser Laishibabo alia ayu saka mazünger, limabur benjong ajak nung adener tamanger benjong ajak nung adener, ibala yimya nung amangertem dang mangmangertem ta ajar. Naga lima khrista asoshi ta nüma tangtanger, akidang limaburtem Yisu tenüng nung temulung meyipbertem arogodener tzüsenertem tülu jongra arogo tenzükba ABAM nung tenüng züluok (Affiliate) saka tanü tensa nung arogo ka dentet dang nüpurtem tzüsenpaburtemi tenzükba anungji tasuba anügoji aji asütsüla saka ABAMI tenüng jatsünü tasuba anügoji aji kümtsür, Tanur asuba agi tenüng ajar ashe tenüng ajaba agi tanur asur masü. Arogo otsü pushitsüngtangtsü kidanger arogo tangi aor itangjibo mezüng arogo tenzükertem tazüngla küma okdoktsür, iba tiya nung arogo aika shiranger aser temoatsü mangur. Tanü tensa nung Edentsükiji arogo, aser nüktapangtari mesüra arogo nungi atsüngtsü alangpaburtemi ni aipelenaogo arogo nungi atsüngjang ta ochi shia atsüngdaktsür. Taküm kaket nungi tenüng aidok. temulung memeyip tashi Eden atsüki nungi aridok. Arogo nungi atsüngertem temulung meyipba tadok meshidaktsür aser pelaseta alirago. Saka ABAMI akidang yimya penshiba agi arogo aika shirangtepber. 1 corin 3 : 6 Pauli ashir Ni atem; ya arogo tenzükba, Apoloi tzü aen; arogo nung tenzükertem saka Tsüngremi indaktsü; Arogo ya Tsüngrem meyong ta kuli agütsür. Kanga mangmangtepber. old age sen ajak chima, mata mapensar teyari sen ajak chima, Ita sen magütsür Electric power anügo nung gonda asem pezü shitang angur saka bill sashira meshir, communities electric bill jungrara saka shingaia memetemtanger bill otang agütsür. Item mapa ya nüpuri asadentsü akok saka lokdi nung tenzükertem ayongdener jembira ajungtsü leman lir sürnung shinga oula maka; sen agi mesüp asü? Mesüra amoi oshe Naga lima tangar dak metaloker kanga paipalemer, Temeshi sapang nungi ochi nongtemba aipen angashir Levi 10 : 1 nung Aron jabsu Nadab baser Abihu tenati miteptsü nung aout aser liangmesen rongga Tsüngrem külem ama asütsü menua mali. Asen Aortem tangipo mapa tamajung nung matentsü mulungtettsü mapang tongago. Nibali nungger Khrista Yisu dak amanger babtist temi temeshi sabang nungi onok kümtetdakba khrista Yisui kümsüker, onoki Coveid 19 metsüpur tetsüpu tetsüpu, onok mozützü agi meshidoker, onok khrista Yisu zü agi shidoker kümsüker ta tamang agi nokdaka sangtongba angur. Covid 19 mapang Aor tamangertem, Tsüngrem tenzükertem tatitang nung tsükogo. Lai pushiba metene Asentenshiba ya tsüngküm nung tzü muluba khen nung mekongga akümba ama lir.

Kangki, ya kümtetdakba masü, kümsüksü makokba kanga rishikangshia mezüngmeshia mak sütsür tepseta südaktsüba süngtong, iba kangki angudang asen kümtetdakba kibuba Yisu asenok menen asoshi asüba bilemtettsü aser Pa dak amangertemi Pai apenba kangki khuret pentettsüsa taremsükatettsü tesayuba ta mangatettratamanger ta asübaji amajok. Kibuba Tsüngremi Dawid dangi Nathan tenyai yokba 2 Samuel 7 : 5-9 Oang aser kü tenzükba Dawid dang shiang yamai kibubai ashir, Nai kü nem talitsü ki ka yanglutsütsü asü? Kechiyong Israel chirtem Ijip nungi ni anir adokba anügo nungi, oda tanü tashi, ni ki ka nung militang, saka süki ka nung aser tekülem dak ka nung jajaogo. Ajak len kechi nungsa ni Israel chirtem den jaja, ni Israel kidong ajak den, shirnok dang ni kü nübur Israel mesütsü melaogo, (Tsüngremi nübur mesütsü Dawid nem nongloktsüba, saka tenüng akidaktsür ashe Tsüngremi mesür) parnok dang kechiba kü nem cidar agi ki ka meyanglutsü ta ni mashi." Anungji tang yamai nai kü tenzükba Dawid dang ashitsü," Yamai Temeranger Kibubai ashir, Kü nübur aser Israel madak na tanishir asütsü asoshi, chiyimdak San sülen anidakba nungi ni na agi; aser na kolenisa ao ni nü den liasü, aser nü madang nungi nü tsükchir ajak lepdoktsü; aser alima nung alir tulurtem tenüng ama ni na tenüng tülu kümdaktsütsü. Dawidi item Tsüngrem ou dak ajemdaker T ken 23 zülu ta angatetter. Tenüngsang ken ajak sangro masü ta parnok mapa agi angatetter. Kechiba Laishiba nung Posü tongtipang? Ozü rongnung Posü ya Tasü (Tako) mali anungji Temeshi Tanüla tsütsü la amshi südi ta angatetter. Tsüngrem jungjunga angatetra Pa nübur mangmangkori nungi Pai kümsüksü Amen Tsüngremi moajang.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

# Impur nung Apu-ani Shisatokden sentong ayongzüka agi



**Impur, January 21 (TYO):** Kibongji tesem ajak asoshi shisaliok tetenzükdak ta angateta, ABAM ajanga achaayanga kibongtem nung tim achaayang kateta Tsüngremer temoatsü agitetsü nükla nung Impur nung alir Apu-ani Shisatokden sentong January 19, 2022 anogo nung "Kümümshidi" omen nung ajemdaker kaogo, ta ABAM Executive Secretary, Rev. Dr. Mar Pongener-i sangdong ka ajanga metetdaksü.

Iba sentong nung kibongtem ajak agi 35 dena liasü. Iba sentong nung shisalen sayur Rev. Tiatoshi Pastor KABA liasü. Shisalen sayur ajanga session asem lemsar agiba mapang nung, Kiyimba kuliziung meyipa repringshiba, Kibong ka asoshi tongtipang tarensen aser Tenzüker ka apuani khuret onüktem lemsaer agia liasü. Tongtipangsa, kibong akümba ya asenok meimchir lokti ka inyaksü mapa ka ama kati ka den tesendaktep yangluba ka masü saka "Tatem maka tezüngzüktep katetba

tesendaktep" ka lir, anungji apuani süa alitsüba ya Tsüngrem nungi agütsüba tatem maka tesendaktep ta angateta lira, kibong nung tia ajak nung tesenep akatsü, ta shisalen sayuri kanga junga angatetdakja temoatsü nguogo. Küm tasen tenzüka wadang balala inyaka aodang kibongtem ajak nung "Tatem maka tezüngzüktep katetba tesendaktep" tangatetba ajanga tensa tia ajak nung tesünep agi süngdakja len aniangma, ta sarasdem ayur.

# Church of England-i 'Gay' apuani moatsütsü atema benok

**January 21, 2023:** Church of England-i Laishiba tetuyuba nung tetsür ka aser tebur ka na tsüngda kiyimba tangatetba nung maneni nokdaksü, ajisüaka kasa tetsür o tetsür/tebur o tebur (gay) kibong kümer alirtem moatsütsü temepishiba agütsüogo. Iba temepishibaji agizükra putirtemi kasa tetsür o tetsür na mesüra tebur o tebur na kibong kümer alirtem meshitettsütsü aser Tsüngrem dang nungi temoatsü meshia sarasademtsütsü, iba denji külemi Arogo züngsemtem danga parnok ama apuanitemji pelaa agizüksü ajungshir. Osang angazükba agi, Church of England-i iba temepishibaji taruba ita London nung Church of England-i (CofE) General Synod aliba mapang nung agütsütsü. Canterbury nung tongti putir, Justin Welby-i, "Kasa o kasa kibong kümer alirtem-a pastor temi tenzüksü, ajisüaka temeshi kiyimbaji tetsür ka aser tebur ka na tsüngda dang, ta Arogo tesayuba nung Arogoi maneni nokdaksü," ta metetdaksü. "Tang tashi Church of England-i kasa o kasa na kibong akümtsü memelar, ajisüaka parnok ama kibong kümer alirtem atema sarasademtsütsü mesüra parnok ama apuani nem temoatsü meshija sarasademtsütsü," ta pai metetdaksü.

"Tang mezüng kasa o kasa kibong kümer alirtemi Tenla kidangi aruteta parnok kiyimba atema tenüngsang agütsütetsü aser Tsüngrem temoatsü meshitettsü," ta pai metetdaksü. Taruba Hokolbarnü Church of England-i osang tejangja sangdongtsü aser February 8 nü iba onük nung o lemteptsü sentong lir. Ano külen Church of England nung Evangelical Khristantemibo tebilemtsü kaja, Church of England-i kasa kiyimertem moatsüba ajanga oda-odabo temeshi kiyimba tsütsü Arogo tangatetba melenshitsuä akok, ta metetdaksüogo. Tan hopta Religion Media Centre-i ayongzükbä o toktepba sentong nung jembidang Church of England Evangelical Council (CEEC) Working Group nung züngsem, Helen Lamb-i, Church of England-i benokba temepishiba yabo tera tali-tabong, ta aitsü. Helen Lamb-i, "Külenbo CofE-i, kiyimba ya tetsür ka aser tebur ka na tsüngda dang, aser ibaji Arogo tangatetba ta ashir, ajisüaka külenbo kasa kiyimertem moatsütsü atema ashir. Anapronglaji külemi asütsü makok," ta ashi. Osangbener den jembidang Church of England Evangelical Council nungi John Dunnett-ia, "Iba temepishiba ajanga tarutsü nungbo Arogoi temeshi

kiyimba tangatetba melenshitsu," ta ashi. Paisa, "Tsüngremi memoatsüba atema kechi kodasür asenoki ibaji (kasa kiyimba) ajungkettsütsü aser parnok moaja tenüngsang agütsütetsü," ta metetdaksü. UK nung tetsür o tetsür na mesüra tebur o tebur na kibong akümtsü melaba denomination tututibaji Methodist Arogo lir. 2021 küm Methodist Conference nung 'kibong akümba teratet' melenshitsu atema vote agütsütep aser kasa tetsür o tetsür na, aser tebur o tebur na kibong akümtsü melatsü atema vote 254 agütsü aser ibaji anema agütsüba vote bo 46 dang liasü. Church of England mesüra Roman Catholic Church natibo kasa tetsür o tetsür na/tebur o tebur na kibong akümtsü memelar, ajisüaka Scottish Episcopal Church aser United Reformed Church na nungbo ibaji melar. Ireland nung Methodist Arogoibo, temeshi kiyimba ya tetsür aser tebur na tsüngda dang asütsüla, ta tangatetba nung lir. Tamalen Ireland nung Methodist Arogo Conference nung General Secretary, Dr Heather Morris-i, "Ireland nung Methodist Arogo ya temeja aser tashi temeja aliba tentet ka lir. Temeshi kiyimba ya tetsür o tebur na tsüngda dang asütsü, aser iba tangatetba nungjagi Arogoi khenyongji matsüngshir," ta metetdakja liasü.

# ANO GO ABEN TSÜNGREM DEN

## KIBUBA KÜ SANNÜKER

*"Kibuba Kü sannüker; ni kechaia manüngtsi" - T.Ken 23:1*

San anüktsüba ya mapa kanga tasak ta ashir. Sannüker kati pei santem mein dang Pa tama ser maor saka Pa tesülen ser san ajakji repringshia anepbalua rem lanu alidak bushia lanir oer chimdaksür. Ano sannüker ajaki arem min nung aser ayaterem nung parnok amua maor kechiba süra santem kümzüksü asoshi par khuret lir. Israel pur tangatetbaji par | Tsüngremi amua maor. Pai parnok teti nüka alir. T.Ken 121.

San anükertemi amshiba mechi aser ajok ya kechi atema, ta süra santem len anitsü, mesamatsü, meprokshii longjema alitsü asoshi aser santem lendong, tsükchir ket aser shiruru nungi kümzüksü asoshi lir.

Anungji tanü asenok Khristan kibong nung Tsüngrem den teti longjema alitsü asoshi aser kibong nung kata mesamai alitsü asoshi, Tsüngremer mechi aser ajok tamangji alitsüla. Dawid dak iba tamang aliba ajanga Pa mulung süngzüka liasü. Tanü asenok khristan kibongtem laika mulung süngzüka melitetba jenjang ka nung lir.

Kechiba? Tsüngremer ajok aser mechiji shidak nung mamshir. Anungji, tebenja putu ka nung asen kibong Tsüngrem den telongjemji meraksai alitsü asoshi asenoki asen sannüker Tsüngrem dak teti jenoka lidi.

# Tayimtsü lendong nung pastor ka yiru aser Arogo züngsem 4 asü

**January 20, 2023:** Tan züngsem ana- Tyler hopta tayimtsü tilaka Patterson aser Tyler tsükokba lendong ka Springer nungger liasü ta nung Germantown, jangaogo. Iba tayimtsüji Tennessee nung aliba Tucker-i ania liasü. Harvest Arogo nung Arogo sangdong pastor yiruba aser Arogo züngsem pezü asüba atema Arogoi amangbapurtemi tatem o-a meshii onok toktsür aoba ajanga onok kanga mangyimer," ta metetdaksü. Federal Aviation Administration (FAA)-i ashiba agi, gol ka dang aketba Piper PA-46 Tayimtsü tsükokba tayimtsüji Texas kübok lendong nungji pastor Yoakum Municipal Kennon Vaughan dang Airport-i aoba mapang kümzüka liasü, aser pa nung tsükokba liasü. tang Texas nung aliba hospital ka nung mongdar. FAA-isa, tayimtsü Arogoisa pastor tsükokba lendong nungji Vaughan atema maneni tayimtsü anisang den sarasademjang aser Bill, mena alir asem asü aser Steve, Tyler aser tayimtsüji kanga mejungi Patterson'er kibongtem raksa, ta metetdaksü. atema sarasademjang, ta Facebook post ka ajanga mepishia metetdaksü. yamai sangdong, Anogo ishika jakdang tayimtsü tsükokba North American Mission lendong nung asür Board nung church nisung pezüji Arogo planter, Clint Clifton-a executive Tir, Bill Garner, Georgia nung tayimtsü Arogo nung deacon Steve lendong ka nung tsükseta Tucker aser Arogo nung süogo.

**AO OSHI ANGAZÜKDAK:  
TANÜ ANGAZÜKTSÜBA OJANG**



**Oraki**

(n) tzüin tsüngrem (god of waterfall)

\* Asen tsüraburtemi tzüin tsüngrem ka lir ta amang.

**Oralok**

(n) o medenloka shisem (appendix)

\* Kaket züludang **oralok** karbo enoksemtsüsa akümer.

**OLONG PAITEP # 6406**

Grid for OLONG PAITEP # 6406 with numbers 1-24 and shaded cells.

**TIPIEN**

- 1. Saku - (4)
6. Songjen - (7)
7. Mali/Tazüng - (4)
9. Tasen apok - (6)
11. Songtem - (3)
13. Ata liasü - (5)
16. Tzünglu den külemi tsüker - (3)
17. Aso tila - (6)
20. Tashi maküm - (4)
24. Tenüng kasa jatepba - (7)
25. Ki yangluba oset - (4)

**LANGTSÜNGLEN**

- 1. Taksep - (3)
2. Langtem - (5)
3. O tamendaktak - (4)
4. Nütsü teubba - (3)
5. Anüngdang tesangwa - (3)
6. Apitet - (5)
7. Yagi jungdaksür - (4)
8. Anogo semer ka - (3)
10. talsü - (3)
12. Tebur kidong aser zünga kasa tsungda jatepba - (4)
14. Pela agizükba tapu ka - (5)
15. Tenüng atet - (3)
18. Mejanga onü - (5)
19. Talak techira - (4)
21. Maneni - (3)
22. Nübo teyi - (3)
23. Meshi - (3)

**OLONG PAITEP # 6405 TELANGZÜBA**

**TIPIEN :**

- 1. Ongpanglu, 6. Aidok,
7. Asang, 10. Sentong,
12. Ayong, 14. Mepet,
15. Kinüngtsü.

**LANGTSÜNGLEN :**

- 1. Ojang, 2. Gado, 3. Aok,
4. Ladang, 5. Angur, 8. Ata,
9. Atala, 10. Süoshi, 11. Metsü,
13. Apet. 14. Min.



**WARAKLA TAKAR SHISANGER**

**Warakla**

: Ayaa atongtsü, ni ya oda chiyungtsüa kecha chinüaka mali, boila ümrem mongmong, jibi, kobi amala ya khenyongi machiner, oda carrot o beans na külemi boil asüba den ang cauliflower ama, broccoli amala ya dang terara chiner, aserbo süngo ajemdanga Mokochung biscuit, ajia Unique, Classic aser Aier bakery indang metenra terok atena malur, ya oda kanga tasaka.

**Tatongtsü**

: Atong ya ni nü lecture angai aruba masü saka asen kiyongtsür dang nai apua aliba sendong den tetemlok ajak asüngsa close asütsü, aserbo nürü jang apua aliba toa tan itasa meyipjang ta ashii aruba ako noo.

**Warakla**

: Ok ok, ni merangdangdi.

~ Lilir : WhatsApp

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

**Tripura nung IPFT aser TIPRA Motha party ka kuma lokteper**

Agartala, January 21, 2023 (Agencies): Tripura nung February 2023 nung assembly elections agitsü aliba jakdang BJP sorkar den yariteper Indigenous People's Front of Tripura (IPFT)-i Tipra Motha den lokteptsü aser "TIPRA Motha-IPFT" ta ajatsü telemtetba agiogo. s

Taoba hopta Indigenous People's Front of Tripura (IPFT)-i Opposition party Tipra Motha den tesentaktep yangluba osang prokshia liasü. Tipra Motha ya Tripura chuba jabaso Pradyot Bikram Manikya Deb Barma-i aniba telok lir.

Tripura nung BJP den yariteper IPFT dang Tipra

Motha Chairman Pradyot-i lisoportem atema longjemtsü ayongzükba sülen iba telemtetba agiogo.

TIPRA Motha mesüra IPFT maitsü kübok Tiprasa nunger temeten atema noktakra tajangzük alitsü ta Pradyot-i ashi.

"Asenoki melongjemra kecha mangutsü" ta paisa shisem.

TIPRA Motha-i ghonda 12 mokdangtsü:

Külen, Tipra Motha-i January 23 nü Kamalpur sub-division ghonda 12 mokdangtsü ayongzükogo.

January 18 nü Tipra Motha züngsem ka tepsetba anema parnoki iba sentong ayonger.

Iba lendong nung tasüsangji Pranajit Namasudra liasü aser pa den asüpila sentong ka agidang administration-i noktang ta Tipra Motha züngsem Mary Debbarma-i ashi.

Iba mapang ketdangsurtem den atsütep dang Tipra Women's Federation nung züngsem aika yiru, ta lai ashi.

"Tanü-a ketdangsurtemi silent march ka agitsü memolunger. Anungji January 23 nü Kamalpur sub-division ajunga ghonda 12 mokdangtsü onoki lemtetogo. Onoki administration dang Namasudra tepseter ajak aputsü atema takhangba agütsütsü" ta Mary Debbarma-isa ashi.

**Centre-i UNESCO dangi Charaideo Maidam tenüng abentsü: CM Sarma**



Himanta Biswa Sarma

Guwahati, January 21, 2023 (Agencies): Ahom yimli indang Charaideo Maidam ya World Heritage site ka akümtsü atema Centre-i UNESCO dangi shidi zülutsü lemtetogo ta Assam Chief

Minister Himanta Biswa Sarma-i ashi.

Linük nung tesem 52 nungi Prime Minister Narendra Modi-i Assam nung Charaideo Maidam shimtetogo, ta pai ashi. January 16 nü Prime

Minister Narendra Modi dangi shidi ka züluba nung "Assam sorkari Charaideo (Assam) nung Charaideo (Assam) indang Moidams-the Mound-Burial System ya Archaeological Survey of India (ASI) dangi cultural heritage site atema agütsüogo aser iba ya 2023 küm UNESCO nem asadangtsü atema yoktsü" ta CM Sarma-i ashi.

Moidams (Maidams) ta asüba ya Assam nung Tai Ahom nunger mang aremba lir aser iba inyakyim ya küm 600 jungnüa benshia liasü. Tang tashi nung Charaideo nung Moidams 386 reprangdangba nungi royal burials 90 tashi wazüka lir" ta Sarma-isa PM Modi dang ashi.

**Imphal nung tapoktsü aser prangpong-injang aika angu**

Imphal, January 21, 2023 (Agencies): Manipur kübok Imphal West district nung prangpong-injang aika ngutetogo ta police ketdangsur kati ashi.

4 Assam Rifles-i osang sangoktsüba nung ajemdaker Commando telok kati Langol Tarung yimtsüng nung tapoktsü aika angu.

Commando temi Kahaopou

Panmei'er ki jakdang mita aodang jiro lu ka nung detonators 8 dena tapoktsü aika angutet.

Iba tesem nung 5.7mm ammunition 35 nos, cortex wire coil 3, AK series Rifle ka den magazine ka, PEK plastic explosive 646.8 grams aser detonators 8 miima yua aliba angu.

Ano, Khurai Puthiba

Leirak nung Yumkhaibam Rajendra'er kidang hand grenade ka angu.

Item ya Manipur police bomb disposal squad team-i Nongmaiching hill range nung raksaa endok.

Item tapoktsü anguba sülen police telokisa Paona Bazar, Mekola aser Meitram nung hotel 7 mita ao saka nisung apuba osang kecha mali.



Aizawl nung aliba Assam Rifles Ground nung Pawl Kut benjung amongba noksa angur. Tanü benjung tembangba sentong nung Chief Minister Zoramthanga-i Kut Pa (Chief Guest) ama shilem agia liasü. Pawl Kut ya Chapchar Kut sülen Mizo nunger atema tongtipangtiba benjung ka lir. Iba benjung ya January ita anogo ananü amonger aser Tsüngrem nem tenüngsang agütsüba den tanurtem nungtem nung amonger. (Aizawl, January 21)

## Burkina Faso nung tetsür aser tanurtem kümzükogo



January 12 aser 13 nü telungpurtemi pur aoba tetsür aser tanurtem security force temi kümzükogo parnok kinungertem den longjemdaksüba noksa nung angur.

**Ouagadougou, Aenjeti/January 21 (Agencies):** Burkina Faso nung Security forces-i tanur aser tetsür 66 kümzükogo, parnok ya taoba hopta telungpurtemi pur ao asütsü ta temulung melemi bilemer, ta state TV sangdong ka ajanga metetdaksü.

Telungpurtemi kanga timtem agütsüba tesem ka nung chiyongtsü bendena aliba mapang parnok ya pur ao.

Telungpurtemi pur ao asütsü ta bilemertem ya parnok por aoba tesem nungi anülulentiplen km 200 shi pila security checkpoint ka nung bus ka nung nguteta liasü, ta osang ajangsa metetdaksü.

Parnok pur aoertem ya apu mapu iba indang osang tejanga

memetet.

Hokolbar aonung Stae TV-i kinü tanur kar densema tanur aser tetsürtem airport ka nung bus kati tuya aliba noksa sayuogo.

"Parnok pur aoertem ket nung anogo ti tashi aliba sülen parnok nüjiso nguogo," ta osangbeneri ashi.

Parnok tang linük yimtiba Ouagadougou nung lir aser parnok pur aoertem indang, parnok sota ayuba aser parnok convoy indang tali jangjatsü atema ken o asüngdangtsü imlar, ta security source kati AFP news agency dang ashi.

Tetsür aser tanurtem ya Arbinda district nung January 12 aser 13 nü putena liasü.

Iba tesemi aiba aser atokba

lenmangtem ya telungpurtemi nokdangter lir. Iba tesem nung nüburtem chiyongtsü agi anüingba ajanga kanga timtemtepdar.

Taoba ita longkak aitertemi Arbinda nung chiyongtsü bushia warehouses ka rakpoka ai.

Burkina Faso nung küm aika telungpurtemi timtem agüja arudar aser iba ajanga nisung million ana shi pei talidak ki toktsür jenshiaogo.

Linük nung military-i taoba küm January ita sorkar atsüng aser telungpurtemi tebilemstü bentettsütsü nangzük. Telungpur tebilemstü mebantetba sülen officer tanga telok kati September ita ano sorkar atsüng, ajisüaka azütokshi lendong maziükteti arudar.

## Omicron: Canada nung lisopurtem dang Covid-19 booster dose agitsü ajungshir

**Toronto, Aenjeti/January 21 (Agencies):** Canada nung health ketdangsurtemi lisopurtem dang Covid-19 vaccine booster dose ka agitsü atema shia arudar. Omicron sub-variant XBB.1.5 menar aika küma aoba mapang ka nung tang iba tetuyuba agütsüogo.

National Advisory Committee on Immunization (NACI)-i Hokolbarnü tetuyuba tasen agütsüogo aser tashidak agi kanga mejungi shirangtsü ana nung alir arishi küm 12 temapurtem ajak booster shot kakabosa agitsü metetdaksüogo.

NACI-isa, arishi küm 5 temapurtem nem booster shot ama bivalent mRNA vaccines

agütsü nung ajungtsü ta shiogo. Iba amala vaccine yagi coronavirus original Wuhan variety aser Omicron variant nungi tekümzükba angur. Canada nung iba vaccine ya taoba küm September ita nungi angur.

Iba ita XBB.1.5 sub-variant menar shilem 7 agi timba akümtsü ta takzür aliba mapang ka nung booster doses agitsü tetuyuba agütsüogo.

"Canada nung XBB variants menar tali akümtsü imlar, saka iba variant ya dominant lineage ka akümtsü makümtsü ajibo mejanga," ta Canada indang chief public health officer Dr Theresa Tam-i ashi.

Ajisüaka 2022 küm tetenzüklen Omicron variant

menar tali küma aoba tangbo tajemba kümer lir. "Nationally tangbo tashidak menar kanga telongjungabo mali aser iba variant mesüra variant tasenba ajanga kanga timtem agütsüba tali akümba indang kulibo kecha mali," ta Tam-i ashi.

Tashidak ayimsünga prokshia meyoktsü atema jenjang tapet agiba agi teperi asütsü, ta Tam-isa ashi.

2022küm Canada nung Omicron variant menar aika liasü, ajisüaka tashidak agi kanga mejungi tonga critical care nung admit asüba aser mozüki nung temang anepalurtem asüba tajemba kümogo, ta lai ashi.

January 16 tashi nung Canada nung tashidak menar 16,540 talila aküm.



Southwest China nung Tibet Autonomous Region kubok Nyingchi nung avalanche aluba sülen tekümzükertem avalanche agi anenbangertem bushiba noksa nung angur. Iba lendong nung nisung 28 süogo, ta Xinhua news agency sangdong ka ajanga metetdaksü.

## Mulungnen O



**Dr. S. Imkong Tushi Ao**

18th January 1935 ~ 16th January 2023

Onok asür Dr. S. Imkong Tushi Ao'er kinungertem, onoki kanga nungdaka aliba mapang sarasadem, tajungshi o, rongsen aser anibelem mesasai nübu agi shirnokisa onok nongita yariogo nenok ajak dang kanga pelaba lemsateper.

Nenok temeim aser teyari onoki kodanga mamatoktsü.

~ Mrs. Rowena Tushi, Chinur, Semchir aser kinungertem

### Office of the Mongsenyimti Kaketshir Telongjem TEPELA LEMSATEPER

Langpangkong Students Conference (LKM) küm 75 Washimong aser 33 buba saisabong sentong January 9-13, 2023 tashi Chuchuyimlang nung akadang Mongsenyimti Kaketshir Telongjem (MKT) nungia oa shilem agia tentettsüsa Mongsenyimti Rionsanger Putu Menden-i anir lokti balala, sensosanger aser temeimer shirnokisa rongsen lenmang balala nung yaritepa aruogo, nenok ajak dang MKT-i kangasa pelaba lemsateper. Tarutsü anogotem nunga nenok teyaritep tajung asen MKT-i yimla atar aser teyariteper ajak Teyanglur Tsüngremi molamoshia moajangma ta MKT tamang sarasadem.

Sd/-  
Tsüngremketba  
President,  
MKT

Sd/-  
S. Ramok Ozukum  
Convenor,  
MKT Organising Committee

### SÜR KÜM 50 AJUNGBA MENUNGRA BILEMTETTER ASÜR TAREPLIBA (Debuia)

*Temeim Oba,*

Na Akümüli tembanger küm tenem tonga arudang onoki ne temeim aketba, tejungnü, teyarinü, ochi melongsentsü aser mapa tajungtem anogo shia onoki menungra-a bilemteter.

Tanüa onoki na bilemteta sarasadema amunger. Tsüngremi asür tanela maneni anisüngzükdak yujangma.

~ Temeim Chirnurtem, Semchirtem & Adianu Kinungertem.

**GILEAD NURSING HOME**  
Hope & Care

ADMISSION OPEN FOR 2023-2024

**NURSING ASSISTANT/DHAI**

**BEST INSTITUTE FOR PROPER TRAINING IN NURSING CARE.**

**LIMITED SEATS ONLY.**

**LAST DATE FOR ADMISSION- 07/03/2023.**

**COURSE WILL BEGIN FROM 15/03/2023.**

**APPLY NOW.**

03862-796306 | +917005904700 | GILEADNURSINGHOME@GMAIL.COM

## India Vs New Zealand: India-i tanabuba ODI kokogo



Honibarnü tanabuba ODI asaya India-i wicket ti agi New Zealand madak takok ngur ground nung pelatepba noksa angur.

**Aenjeti/January 21, 2023 (Agencies):** Hyderabad nung tatebangbuba over tashi kanga toktepba asayaba sülen Honibarnü tanabuba ODI asaya India-i wicket ti agi New Zealand madak takok nguogo.

ODI asaya asem asayatsü aliba nung India-i anabo kokatokogo.

Tetenzük nungi India-i nung bowler temi ball kanga junga ona asaya amokbanger asaya aser New Zealand pur over 35 majungdang asayar ajak out süja run 108 dang yangludaksü.

Run arishiba mapang India-i over 20.1 nung NZ-i yanglur aliba run menepa liasü. India team nungi captain Rohit Sharma-i ball 50 nung run 51 yanglu. Pai four pezü aser six ana züka liasü. Iba sülen Shubman Gill aser Ishan Kishan nati asaya tatem tashi asaya liasü. Iba asayamung densema India-i tang tashi nung kidang ODI asayamung tenetbuba atonga kokogo.

Mezüng ball aontsü shimba sülen asaya nung Mohammed Shami aser Mohammed Siraj nati tetenzük nungi ball kanga junga

aon aser NZ pur-i run 9 yanglur aliba mapang asayar 3 out sütsü. Hardik Pandya-ia maiden over asem aon aser over trok nung run 16 agütsür wicket 2 agia liasü. NZ pur-i run 15 yanglur aliba mapang asaya pongu out süadok aser parnok rongnung top order batsmen pongui single digits dang yanglua liasü.

Iba sülen Glenn Phillips-i Michael Bracewell aser Mitchell Santner na den külemi run 100 adena yanglu, ajisüaka taoba asaya ana nung run 349 aser 390 yangluba team atema run 108 ya kanga apara liasü.

## Australian Open: Rublev aser Sabalenka na last 16 tongogo



Andrey Rublev & Aryna Sabalenka

**Aenjeti/January 21, 2023 (Agencies):** Honibarnü Australia Open tebur kija asaya nung fifth seed asayar Andrey Rublev-i Dan Evans koka last-16-i iogo. Pa taruba asaya Holger Rune den asayatsü.

Russia nung asayar yagi 6-4, 6-2, 6-3 agi Evans madak takok ngua iba asayamung nung tang agi tasembenbuba fourth round tongtetogo.

Pa quarter-finals nung jenjang ka atema Denmark nung asayar Rune den asayatsü, shibai France nung asayar Ugo Humbert 6-4, 6-2, 7-6 (7/5) agi koka liasü.

World number 6 tashi tonga asayaba den ATP title 13 tashi bener liaka Rublev-i tang tashi nung Grand Slam ka nunga danga quarter final adena asayadanga mali.

Rublev, shiba iba asayamung masaya tsüngda warm-up

asayamung ana tashi nung tamakok nguogo, pai ashiba agi, Grand Slam nung asayayonga aoba mapang pai pasasa dak tali temulung lemteta akümer.

"Asaya shia ni tajungba tajungba asayar, ibayongji ni kanga pelar, kechiyong season tenzükba mapang nung anaben tashi tamakok nguogo," ta pai ashi.

Kasa asayamung tetsür kija asaya nung Aryna Sabalenka-a round pezübubai iogo. La taruba asaya Olympic champion Belinda Bencic den asayatsü.

Belarus nung asayar yagi Margaret Court Arena nung asayaba mapang Belgium tsür Elise Mertens 6-2, 6-3 agi koka liasü. Taküm küm tetsürtem rongnungi iba asayamung akoktsü imlartem rongnung Sabalenka-a ka lir.

Sabalenka-i minute 74 dang agia taoba mapang la indang doubles partner ya koka liasü.

Tena senteper 2021 küm Australian Open densema asayamung pongu kokogo.

"La den asayatsü temela masü. La kanga dang asayar tajung aser kanga meranga asayaba asayar ka lir," ta Sabalenka-i ashi, shibai tang tashi nung Grand Slam ka danga koka mali.

"Asaya temela masütsü ta meteter liasü aser asaya tetenzük nungi tatem tashi rangloker asayateta asaya akokba atema kanga pelar," ta lai ashi.

Kasa mapang nung Switzerland tsür Bencic-i 6-2, 7-5 agi Italy tsür Camila Giorgi madak takok nguogo.

Sabalenka aser Bencic naprongla taküm Australia Open nung kanga junga asayar arudar.

Tenapronglai iba ita tetenzüklen Adelaide nung asayamung kaka kokogo aser Melbourne nung iba asayamung nung set kaka nunga dang tamakok mongui asaya arudar.

Maneni tetsür kija asaya nung Karolina Pliskova-i Russia tsür Russia tsür Varvara Gracheva 6-4 6-2 agi kokogo aser round pezübuba nung la China tsür Zhang Shuai den asayatsü.

Croatia tsür Donna Vekic-ia 6-2 6-2 agi Spain tsür Nuria Parrizas Diaz koka round pezübuba tongtetogo.

## ICC-i 2028 Olympics nung team 6 T20 asayatsü benok

**New Delhi, Aenjeti/January 21 (Agencies):** Los Angeles 2028 Olympics nung cricket asaya benoka asayatsü atema International Cricket Council (ICC) timla mesamai lir, aser iba asayamung nung tetsür aser tebur naprongla team trokrok T20 asayatsü atema asayamung ayongzükba committee dangi bendangogo.

Iba asayamung nung cricket asaya benoka asayatsü atema International Olympic Committee (IOC)-i October ita meta telemtetba agitsü. Asayamung ayongertemi March ita tashi nung iba asayamung nung asaya tasen benoka asayatsü atema telemtetba agitsü, ta ESPNcricinfo sangdong ka ajanga metetdaksü.

Iba ken o ya Mumbai nung IOC session agiba mapang asadangshitsü, koba taküm October ita meta agitsü imlar, ta kasa sangdong ajanga metetdaksü.

BCCI secretary Jay Shah, ICC indang Olympics working group nung züngoksemogo. Iba

telok ya ICC mendenbuba Greg Barclay lenisüba nung inyaksangshir, kong Indra Nooyi (independent director) aser Paraag Marathe (former USA Cricket president) nata densema lir.

2036 Olympics ayongzüka asayatsü atema India nükjidong aliba temulungdang yur Shah iba committee nung züngoksemogo. "Alima nung asayamung tulutiba nung cricket asaya bendenloksü atema IOC den sensaksemba mapang Shsh-i shilem agiba ajanga teyari tulu angutsü ta ICC-i amanger," ta kasa sangdong nung shia lir.

Team trok asayatsü atema benokdangba ya cost efficient Olympics ka asoshi lir, koba Olympic Agenda nung shilem ka lir.

Cricket den külemi baseball/ softball, flag football, lacrosse, break dancing, karate, kickboxing, squash aser motorsport amala asayatem LA 28 roster-i aitsü atema toktepdar.

## Leicester City-i Victor Kristiansen alizükogo



Victor Kristiansen

**Aenjeti/January 21, 2023 (Agencies):** Leicester City-i Copenhagen defender Victor Kristiansen pound million 17 yong alizükogo. ajisüaka international clearance nungdaksü.

Kristiansen den küm ponguser tesadang atema tenanzüktepba yangluogo aser pa club nungi 2028 küm tashi asayatsü. Pa ya Denmark Under-21 nungi asayar ka lir.

Arishi küm 20 tain asayar yagi manager Brendan Rodgers' nem left-back nung tanga option ka agütsütsü kechiyong James Justin amala asayatem yirur asaya tenzükshitsü asoshi mapang talangka agitsüsa kümogo.

"Ni kanga pelar," ta Kristiansen-i club website dang ashi. "Idaki arua adenba atema jangradema bilemer."

Paisa, "Premier League ya alima nung league rongnung

tajungtiba asütsü südi aser Leicester ya temaba jenjang nung asayaba team ka lir, anungji ni kanga pela liasü.

"Iba maongka agitsüba ma ta ashitsüji tamakoktsü," ta pai ashi.

World Cup tembanga domestic football tenzükshiba sülen Leicester pur junga masayateti arudar aser parnok asaya pezü tashi atonga tamakok nguogo.

Parnok tang Premier League nung jenjang 15buba nung lir aser relegation zone-i aitsü asoshi point ana agi dang jenbor lir.

Kristiansen shiba Copenhagen nungi asaya 70 dak tema nung asayaogo, pa ya Honibarnü Leicester aser Brighton na King Power Stadium nung asaya nung shilem magitettsü. Pa Hombarnü nungiang training tenzüktsü.

## BILEMDANGANG

"Arakzua inyaksangshiba ajanga temang anema toktsür."